

**Atvinnuvega- og nýsköpunarráðuneytið****Skúlagötu 4****101 Reykjavík**

Reykjavík, 11. janúar 2019

Umsögn Landssambands veiðifélaga um drög að frumvarpi til laga um gjald vegna nýtingar eldissvæða í sjó.**Almennt um frumvarpið**

Landssamband veiðifélaga lýsir miklum vonbrigðum með drög að frumvarpi um gjaldtöku vegna nýtingar eldissvæða í sjó. Sú stefnumörkun sem fram kemur í frumvarpsdrögunum er röng að mati Landssambandsins. Verði frumvarp þetta óbreytt að lögum er ljóst að löggjafinn hefur varpað fyrir róða tækifæri til að lögfesta fjárhagslega hvata til að beina laxeldi í sjókvíum inn á umhverfisvænni og sjálfbærari framleiðsluaðferðir, en notast er við í dag. Landssambandið leggst eindregið gegn því að lögfest verið að rekstrarleyfishafa, sem elur ófrjóan lax, eða notar lokaðan eldisbúnað, verði gert að greiða gjald fyrir afnot af sameiginlegri auðlind. Auðlindagjald verði aðeins lagt á þau fyrirtæki sem ala frjóan framandi laxastofn í opnum sjókvíum. Er það í samræmi við þá megin stefnu sem starfshópur um stefnumörkun í fiskeldi setur fram í skýrslu sinni frá því í ágúst 2018.

Þau eldisfyrirtæki sem ekki stunda sjálfbæra og umhverfisvæna starfsemi með eldi á frjóum laxi greiði hins vegar tiltölulega hátt auðlindagjald. Fyrirhuguð upphæð í frumvarpsdrögunum, eða 10 kr. á kg. í rekstrarleyfi, er allt of lág að mati Landssambandsins. Upphæðina þarf að tvöfalda að lágmarki svo einhver hvati til breytinga hljótist af lögum. Þá gerir frumvarpið ekki ráð fyrir að auðlindagjaldið taki mið af verðlagsbreytingum.

Landssambandið bendir á að mikill árangur hefur náðst hin síðustu ár í þróun umhverfisvænni eldisaðferða. Nú snýst umræðan ekki síst um hvað teljist erfðabreyttur lax (GMO). Þær aðferðir sem helst eru til skoðunar við geldingu laxa eiga ekki að leiða til þess að afurðin verði talin erfðabreytt vara þar sem aðeins er slökkt á hluta erfðamengins en ekki bætt inn geni. Þá hafa einnig orðið stórstígar framfarir í framleiðslu eldisbúnaðar svo ala megi fiskinn í lokuðu kerfi. Betri eldisaðferðir eru því handan við hornið. Í gildandi löggjöf er því miður engan hvata að finna sem leiðir til þess að fyrirtækin tileinki sér þessa nýju tækni. Því telur Landssambandið mjög mikilvægt nú, þegar auðlindagjald verður lagt á fiskeldisfyrirtæki, að auðlindagjaldið verði nýtt sem stýritæki til að gera það eftirsóknarvert fyrir fiskeldisfyrirtækin að þróa og taka upp umhverfisvænar framleiðsluaðferðir. Landssambandið telur einnig í þessu sambandi að

hafa skuli til hliðsjónar markmiðsákvæði fiskeldislaga nr. 71/2008 þegar stefnan er mótuð um gjalddöku af fiskeldi.

Í greinargerð með frumvarpsdrögum segir að:

„Frumvarpið getur haft jákvæð óbein áhrif á umhverfi og sjálfbærni villtra laxastofna vegna afsláttar rekstrarleyfishafa, sem stunda eldi á ófrjóum laxi og eldi með lokuðum eldisbúnaði, á gjaldinu.“

Landssambandið bendir á að sú ráðstöfun, að leggja hálf auðlindagjald á eldi á ófrjóum laxi í sjókvíum eða eldi í lokuðum kerfum líkt og ráðgert er í fyrirbyggjandi frumvarpsdrögum, mun því miður vinna gegn sjálfbærri þróun í fiskeldi á Íslandi.

Landssambandið leggur til eftirfarandi breytingar á frumvarpsdrögum:

Um 5. grein.

Fellt verði brott úr fyrstu málsgrein: „*eða ófrjós lax*“. Í annarri málsgrein falli brott: „*af eldi á ófrjóum laxi*“, og síðar „*með lokuðum eldisbúnaði*“.

Þá verði ein upphæð auðlindagjalds á hvert kg. í rekstrarleyfi sem verði tvöfölduð hið minnsta miðað við þá upphæð sem nefnd er til sögunnar árið 2023. Þá er einnig nauðsynlegt að verðtryggja auðlindagjaldið t.d. með tengingu við SDR líkt og gert er nú með gjalddöku í Umhverfissjóð fiskeldis.

Um 6. grein.

Við annan málslið fyrstu málsgreinar bættist við frjós lax og verði hann svohljóðandi:


Gjaldið skal ákveðið í samræmi við hámark leyfilegs framleiðslumagns frjós lax gildandi rekstrarleyfa þann 1. janúar ár hvert og er gjalddagi þess 1. maí sama ár.

Landssambandið ítrekar að með því að nota auðlindagjald sem stýritæki nú, skapast einstakt tækifæri til að beina fiskeldi í þá átt að mörkuð verði sérstaða íslenskra fiskeldisafurða á markaði sem hágæða vörur sem framleiddar eru með sjálfbærum hætti og í sátt við náttúruna.

Virðingarfyllst,

fh.

Landssambands veiðifélaga



Jón Helgi Björnsson,

formaður LV